

范石湖集

(下)

范

石

湖

集


下

中華書局

光風轉蕙汎崇蘭些此山公

先生小楷氣象石湖居士題

范石湖集



石湖居士詩集卷十九

犍爲江樓

河邊堵立看歸篷，三老開頭暮欲東。漲水稠灘連峽內，淺山浮石似湘中。無人驛路榛榛草，有客江樓浩浩風。種落塵消少公事，賸裁新語寄詩筒。縣令師永錫同年能詩。

宣化道中

瘦草蕭疎已似秋，盤陀山骨束江流。兩崖若不頑如鐵，爭得狂瀾拍岸休！

將至叙州

亂山滿平野，漲水豪大川。仄徑無轍跡，疎林有炊煙。山農旦燒畬，蠻賈暑荷氎。窮鄉足荒怪，打鼓催我船。

七夕至叙州登鎖江亭，山谷謫居時屢登此亭，有詩四篇，敬用其韻

水口故城丘壠平，新亭乃有縉鐵橫。舊戎州在對江山趾，下臨馬湖蠻江路，蠻自江出，必過城下，故置鎖

以爲限。今遷城過江，已失形勝，而猶於亭鎖江，特以攔稅而已，非本旨也。歸艎擊汰若飛渡，一雨徹明秋漲生。東樓鎖江兩重客，筆墨當代俱詩鳴。我來但醉春碧酒，星橋脈脈向三更。郡醞舊名重碧，取杜子美東樓詩「重碧酤春酒」之句，余更其名春碧，語意便勝。

江安道中

近瀘州最險處，號張旗三灘，言張旗之頃，已過三灘，其湍急如此。瀘戎之間有渡瀘亭，然不知孔明竟出何路？今鎖江對岸廢城，下臨馬湖，有韋高紀功碑，歸然荒榛中，疑此或是古迹。

穠綠連村荔子丹，瘴雲將雨暗前灣。張旗且喜三灘駛，叱馭曾驚九折艱。瀘水舟閒迷古渡，馬湖碑缺伴荒山。威名功業吾何有，無事飄飄犯百蠻。

瀘州南定樓

歸艎東下興悠哉，小住危闌把一杯。樓下沄沄內江水，明朝同入大江來。

題譚德稱扇

德稱與楊商卿父子，送余遠至瀘之合江，以扇求詩，各爲題一絕。

蠻風吹雨瘴江肥，短草荒山鳥不飛。盡是瀘南腸斷句，如今分與故人歸。

題楊商卿扇

君歸我去兩銷魂，愁滿千山鎖瘴雲。後夜短檠風雨暗，誰能相伴細論文？

題楊子容扇

雙竹軒窗聽讀書，垂天雲翼要搏扶。與君只作三年別，射策東來過石湖。

譚德稱、楊商卿父子送余，自成都合江亭相從，至瀘南合江縣始分袂，水行踰千里，作詩以別

合江亭前送我來，合江縣裏別我去。江流好合人好乖，明日東西南北路。千里追隨不忍歸，一杯重把知何處？臨岐心曲兩茫然，但祝頻書無別語。

發合江數里，寄楊商卿諸公

臨分滿意說離愁，草草無言祇淚流。船尾竹林遮縣市，故人猶自立沙頭！

過江津縣睡熟，不暇梢船

西風扶櫓似乘槎，水闊灘沉浪不花。夢裏竹間喧急雪，覺來船底滾鳴沙。

恭州夜泊

草山礲确強田疇，村落熙然粟豆秋。翠竹江村非錦里，青溪夜月已渝州。小樓高下依盤石，弱纜西東戰急流。入峽初程風物異，布裙跣婦總垂瘤。

大熱泊樂溫，有懷商卿、德稱

暑候秋逾濁，江流晚更渾。瘴風如火熉，嵐月似煙昏。城郭廩君國，山林妃子園。故人新判袂，得句與誰論？

涪州江險不可泊，入黔江檣舟

黃沙翻浪攻排亭，潰淖百尺呀成坑。坳窪眩轉久乃平，一渦熨帖千渦生。篙師絕叫瞰川靈，鳴鑼飛渡如奔霆。水從岷來如濁涇，夜榜黔江聊濯纓。玻璃徹底鏡面清，忽思短棹中流橫，釣絲隨風浮月明。

妃子園

涪陵荔子，天寶所貢，去州里所有此園。然峽中荔子，不及閩中遠甚，陳紫又閩中之最也。

露葉風枝驛騎傳，華清天上一嫣然。當時若識陳家紫，何處蠻村更有園？

豐都觀

在豐都縣後三里平都山，舊名仙都觀，相傳前漢王方平、後漢陰長生得道處。陰君上升時，五雲

從地湧出。丹竈古柏皆其故物，晉、隋殿宇無恙，壁畫悉是當時遺蹟，內王母朝元隊仗尤奇。道士云：『此地卽所謂北都羅豐所住，又名平都福地也。』

神仙得者王方平，誰其繼之陰長生。飄然空飛五雲輶，上賓寥陽留玉京。石爐丹氣常夜明，竈光萬柏森千齡。峽山偪仄岷江縈，洞宮福地古所銘。云有北陰神帝庭，太陰黑簿囚鬼靈。自從仙都啓巖扃，明霞流電飛陽晶。暉景下墮鑠九冰，塞絕苦道升無形。至今臺殿棲玲嫋，隋圻唐堊留丹青。十仙怪奇溪女清，瑤池仙仗紛娉婷，琅璈赴節鏘欲鳴。我來秋暑如炊蒸，汗流呀氣扶枯藤。摩挲衆蹟不暇評，聊記梗概知吾曾。

萬州西山湖亭秋荷尙盛

叢蒼忽明眼，山腰灩湖光。列岫繞雲錦，深林護風香。西山卽太華，玉井餘秋芳。隔江招岑仙，共摩雙蓮房。

下巖

疇昔中巖一夢殘，下巖風景亦高寒。峽中無處堪停棹，雨後今朝始凭闌。不用苦求毫相現，祇教長挂水簾看。山僧勸我題蒼壁，坡谷前頭未敢刊。

魚復浦泊舟，望月出赤甲山，山形斷缺如鼉龍坐而張頤，月自缺中騰上山頂

月出赤甲如金盆，蹲龍呀口吐復吞。長風浩浩挾之出，影落半江沉復翻。天高夜靜四山寂，惟有灘聲喧水門。高齋詩翁不可作，我亦不眠終夕看。

夔門卽事

自東川入峽，路至恭州，便有瘠俗。夾岸山悉痺小，入夔界，山皆傑然連三峽。夔水不可飲，取之臥龍十里之外。雲安麴米春，自唐以來稱之，今夔酒乃不佳。

峽行風物不堪論，舂暑驕陽雜瘴氛。人入恭南多附贅，山從夔子盡侵雲。竹枝舊曲元無調，麴米新竊但有聞。試覓清冷一杯水，筒泉須自臥龍分。

瞿唐行

七月十九日至夔子，灩澦撒髮不可犯，是夜水漲及山腹，詰旦視灩澦，則已在水中。土人云：『此

青草齊也，可以冒險而入。』遂鼓棹略其頂而過。郡中遣候兵立山上，每一舟平安，則搖幟以招後舟。白

鹽、赤甲皆峽口大山，黃嵌、黑石皆峽中至險處。入峽西岸有聖泉，舟人或向之疾呼曰：『人渴也』，泉卽

迸下一杯許，復乾。余舟過甚急，未之試也。

川靈知我歸有程，一夜漲痕千丈生。中流擊楫洶作氣，夾岸簸旗呀失聲。不知灩澦在船底，但覺瞿唐如鏡平。鑿峽疏川狼石破，號山索飲飛泉驚。白鹽赤甲轉頭失，黑石黃嵌拚命輕。草齊增肥無泊處，竹枝凝咽空餘情。人間險路此奇絕，客裏驚心吾飽更。劍閣翻成蜀道易，請歌范子瞿唐行。

夜泊歸舟

州有宋玉宅、昭君臺。

舊國風煙古，新涼瘴癘清。片雲將客夢，微月照江聲。細和悲秋賦，遙憐出塞情。荒山餘閨閣，兒女擅嘉名。

秭歸郡圃絕句二首

花竹蕭騷小圃畦，官居翻似隱淪棲。巴山四合秋陽滿，杜宇黃鸝相對啼。

孤城偃仄復偃仄，前山後山青欲來。市聲蕭條衙鼓靜，惟有叱灘喧萬雷。

叱灘即黃魔灘，下

連人鮮瓊。

宋玉宅

相傳秭歸縣治即其舊址，縣左旗亭，好事者題作宋玉東家。

悲秋人去語難工，搖落空山草木風。猶有市人傳舊事，酒壚還在宋家東。

後巫山高一首

余前年入峽，嘗賦巫山高，今復作一篇。十二峯中，東西各一峯最奇，不可繪畫；左

右前後，餘峯之可觀者尙多，不止十二峯也。不問陰晴，雲物常相暎帶，尤爲勝絕。但以漲江湍怒難機

泊，鼓棹而過，不復登廟。前余以水暴漲，得下瞿唐至巫山，縣人云：『却須水退，始可入巫峽。』一夜水落

十餘丈，遂不復滯留。

凝眞宮前十二峯，兩峯娟妙翠插空；餘峯競秀尙多有，白壁蒼崖無數重。秋江漱石半山腹，倚天削鐵荒行蹤。造化鍾奇矗瑤巖，眞靈擇勝深珠宮。朝雲未罷暮雲起，陰晴竟日

長冥濛。瑤姬作意送歸客，一夜收潦仍回風。仰看館御飛檝過，回首已在虛無中。惟餘烏鴉作使者，迎船送船西復東。

黃牛峽

廟爲黃牛神所居，卽石馬繫祠門處。東坡所書歐公詩及本事碑石在東廡。祠後高峯之上有黃牛迹，客舟甚敬之。以歐公故，石馬亦有靈扁，護甚嚴。

朝離悲秋宅，午榜疊石磯。小留黃牛廟，細讀石馬詩。黃牛隱見蒼山裏，石馬至今猶馘耳。當年夢境識仙翁，馬爲迎門神爲起。物生不朽繫所逢，歐詞蘇筆蒼苔封。山高水長翁之風，石馬亦與翁無窮。

假十二峯

卽黃牛峽山，自此直至平喜壩，千峯重複，靡不奇峭。

巴東三峽數巫陽，山入西陵更鬱蒼。何以假爲非確論，直疑溟滓弟高唐。

扇子峽

兩岸山尤奇，殆過巫峽，蝦蟆碚在南岸。

茲行看山眞飽諳，今晨出峽仍窮探。南磯北磯白鐵壁，千峯萬峯蒼玉簪。橫前直疑江已斷，崛起競與天相攙。蜀山欲窮此盤礴，禹力已盡猶鐫劖。望舒宮中金背蟾，泥塗脫盡

餘老饒。下飲岷江不知去，流涎落吻如排髻。挈瓶橫棹酌清甘，未暇煮茗和薑鹽。聊將滌硯濡我筆，恍惚詩律高巉巖。

荊渚中流，回望巫山，無復一點，戲成短歌

千峯萬峯巴峽裏，不信人間有平地。渚宮回望水連天，却疑平地元無山。山川相迎復相送，轉頭變滅都如夢。歸程萬里今三千，幾夢卽到石湖邊。

魯家洑入沌

三江口卽岳陽路，水大難行，遂入沌行。沌中最空寬處名百里荒，盜區也。

過盡巴東巫峽長，荊川鼓棹更茫茫。避風怕入三江口，乘月貪行百里荒。夜後逢人盡刀劍，古來踏地皆耕桑。可憐行路難如此，一簇寒蘆尙稅場！

鄂州南樓

誰將玉笛弄中秋？黃鶴飛來識舊游。漢樹有情橫北渚，蜀江無語抱南樓。燭天燈火三更市，搖月旌旗萬里舟。却笑鱸鄉垂釣手，武昌魚好便淹留！

題黃州臨皋亭

夏口風帆赤壁磯，雪堂醞酒竹樓棋。繫舟一日黃州下，只辦登臨不辦詩。

江州庾樓夜宴

前瞰大江，後臨廬山，登臨名勝，殆甲他處。庾亮南樓乃在武昌，非此也。亮常刺江州，後人製此名，非斯樓之要。

岷江漱北渚，廬阜窺南窗。名山復大川，超覽茲樓雙。何必元規塵，自足豪他邦。使君
梳田熟，新涼籩酒缸。落景澹碧瓦，長虹吐金釭。客從三峽來，噩夢隨奔瀧。小留聽琵琶，
船旗卷修杠。請呼裂帛絃，爲拊洮河腔。曲終四憑闌，倦遊心始降。明發挂帆去，曉
鐘煙外撞。

東林寺

慧遠師白蓮社也，傍有樂天草堂。對山絕頂卽天池，文殊現燈處。李成焚劫南北山，獨不毀二林。

談易繙經宰木春，三生猶自裊煙熏。客塵長隔虎溪水，劫火不侵香谷雲。老矣懶供蓮社
課，歸哉快讀草堂文。山頭一任天燈現，箇事何曾落見聞。

過虎溪，對東林，蒼巖翠樾，下浸大澗，宛似靈隱冷泉。囑長老法才作亭，名曰過溪，且爲率山丁薤草定基，一朝而畢。

過溪無限翠屏開，大笑從教虎子猜。不獨山中添故事，仍教題作小飛來。

病倦不能過谷簾、三峽，寄題

白龍青峽紫煙爐，山北山南只半塗。說與同來綠玉杖，他年終補臥遊圖。

湖口望大孤

廬阜岡勢斷，江流潏相通。大孤如小冠，插入瀟淪中。我欲蛻濁浪，往馭揚瀾風。晃晃銀色界，潏潏水晶宮。濯足望八荒，列宿羅心胸。客帆詎肯駐，搔首蒼煙叢。

澎浪磯阻風

浦口舟藏尋丈慳，篙師抱膝朝暮閒。逆風來從水府廟，濁浪欲碎小孤山。太白猶高缺蟾墮，長江未盡歸鬢斑。短歌聊復怨行路，當有聽者凋朱顏。

馬當汛阻風，居人云：非五日或七日風不止，謂之重陽信。

拍岸回流逆上磯，枯楊折葦靜相依。趁墟漁子晨爭渡，賽廟商人晚醉歸。重九信來風未
愜，大千行徧昨俱非。羈愁萬斛從頭數，帶眼今秋又減圍。

放舟風復不順，再泊馬當，對岸夾中馬當水府，卽小說所載神助王勃
一席清風處也。戲題兩絕

萬里江隨倦客東，馬當山嘴勒孤篷。無才解賦珠簾雨，誰肯相賒一席風。
禁江上口柏山東，三日荒寒繫短篷。却憶宮亭湖裏去，隨人南北解分風。

守風嘲舟子

奪命稠灘百戰餘，守風端坐恰乘除。日長飽飯佳眠覺，閒傍蘆花學釣魚。

佛池口大風復泊

碧葦無思連天生，青山有情終日橫。風聲洶怒木朝拔，川氣流光珠夜明。誰能坐守白頭
浪，我欲往騎金背鯨。俛仰之間撫四海，可憐步步愁江程。

長風沙

夕陽明遠帆，高浪兀孤嶼。綿綿淮山來，閃閃沙鳥去。落木兩山家，炊煙南北渡。眉伸擊汰行，夢愕阻風處。

九月八日泊池口

斜景下天末，煙霏酣夕紅。餘暉染江色，潏灩琥珀濃。我從落日西，忽到大江東。回首舊遊處，曛黃錦城中。藥市并樂事，歌樓沸晴空。故人十二闌，豈復念此翁？

池州九日，用杜牧之齊山韻

年年佳節歌式微，秋浦片帆還欲飛。萬里蜀魂思遠道，九歌楚調送將歸。杯中山影分秋色，木末江光借夕暉。細撚黃花一枝盡，霏霏金屑滿征衣。

離池陽十里清溪口，復阻風

恰從秋浦挂簾櫳，又泊清溪十里餘。愁水愁風吹帽後，作雲作雨授衣初。遠尋草市沽新酒，牢閉篷窗理舊書。行路阻艱催老病，騷騷落雪滿晨梳。